

堅

瓠

集

堅瓠秘集卷之六目錄

秦檜日受鐵鞭

冥王延師

杖卷

兌卷

查勘司

賜奴婢

梁未央大度

易頭腹

海中黑孩

秦女將健兒

巨神呵長

刁筆

狡僧

神鬼有靈

屠語

善斷

宋司理厚德

八條絃

土麴

爲國

号因姓重

竊爐

孟嘗食客

中郎有後

供荔枝

鼻祖耳孫

鞭尸

西王母考

穴中龜蛇

肉塊

冥報

呂需

土鼓鳴冤

顏邦直

賜無畏

年號仍襲

正字紀年

蟠蛇油

兩太宰謫

看殺

來虞子

泥金報喜

清俸

饅頭

酷虐

儉德

蔣侯茅司徒

血逆流

女請代刑

想當然

古人自守

圓解

知足

飲酒賦詩

二氏廢興

千佛寺

剖心觀胎

鬼眼

足下墨子

一身是觚

長頭長脚長舌

堅瓠續集卷之六

長洲石農諸人穫學稼纂輯

秦檜日受鐵鞭

子菴雜錄秀水張恭錫先生晉徵自述爲
諸生時夢入岳王廟王待以客禮旣而辭
出聞廟後樹林中哀號聲往視之見一囚
反接于樹一力士執鐵鞭鞭之張問何人
囚曰吾秦檜也岳王法令每日受鐵鞭一

百公幸與王善能爲吾馬免今日百鞭乎
張諾之復入謁王而王已預知其意不復
爲禮怒叱曰汝向與吾同事吾被檜賊害
汝亦幾不免今何得昧前因而反欲爲賊
乞哀可速退姑貸汝張惶懼趨出再過林
中則見執鞭者又增一人謂張曰王怒公
爲囚祈請令今日加鞭一百張大驚悸而
寤明日猶面熱背汗急往廟拜謝幸無恙

冥王延師

張恭錫嘗于病中夢兩青衣使者持紅帖
邀至一大府第云是冥王府遙望堂上冥
王端冕執圭坐其身大如世間所塑金剛
侍衛森嚴不能仰視使者令張且閉目俄
而開看則王已縮小如常人服常服侍衛
俱退左右止數人揖張升堂叙主賓禮曰
欲暫屈先生爲館師訓吾子作制舉義

以便異日取科第耳張曰王子當自有世
爵安用科第王笑曰卽吾亦不免輪迴人
世作公侯況吾子耶引張入館室呼二子
出拜師子年可十三四甚俊雅王命以項
仲昭燈刻稿與讀謂其文尖穎長入神智
也張爲講解二子殊聰敏恍惚間覺坐館
之口已甚久一旦王開筵謝別酒肴極豐
而張不_覺飲食王亦不相強謂張曰先生

自是科第中人但艱於得子吾今贈先生
以兩子顧左右捧一金盤來盤中坐二小
兒長不及尺宛如粉孩王曰以此酬師足
矣卽命前青衣使送歸張頃刻至家遂醒
身已僵卧兩日矣自是病愈後果得二子

杖卷

張恭錫于崇禎庚午之春至于忠肅公廟
祈夢問秋闈獲雋否夢入闈試畢以三場

文卷一總投納收卷官乃其受業師已故
蔣姓者閱之嫌其文不工擲卷于地命每
卷各杖三十張旁睨自歎吾文不佳致辱
及卷慚憤而寤竊計今科必不利及秋榜
發中第九十名蓋三卷各杖三十共九十
之數而本房座師乃餘杭知縣吾鄉蔣雉
園先生燦也與所夢蔣師姓正符合甲戌
成進士授閩縣令陞部郎

兌卷

遂安方渭仁先生象瑛徒松齋集記部司
馬南和楊仲廷繼芳初任和州知州康熙
丙午苦病冬至夕忽昏迷見一隸執柬相
邀須臾至一府第主人常服延入序賓主
畢俄青衣投一刺楊竊覽之上書遜民周
仁主人遽起出迎周至則瞠然老翁也讓
坐之頃楊推周高年周亦遜楊官長主人

乃謂楊公年尚少此席應屬周君坐定主人出數隸舁二卷箱至曰此明年春闈卷也屬兩公詳定楊因問閱卷舊例隸曰不必閱以天平較其輕重重一斤者爲合式十三四兩次之十兩以下則不入格矣於是楊與周取平馬較兌得一斤者五十餘卷餘重十三四兩不等兌畢隸送楊歸則漏下五鼓矣家人環守榻前病遂愈

查勘司

康熙初吾蘇書生顧某居平奉佛又善扶
鸞偶遇龍樹王菩薩降乩授經一卷皆勸
人忠孝無異儒書後每運乩默誦此經著
薩立降言休咎奇中端午日生被酒晝卧
忽夢冠帶坐公堂侍衛嚴整吏進文書云
陰司新勾到人犯候點名起解見數囚伏
堦下聽點中一女囚裸形不著一絲視之

卽其姊近日暴亡者也生念公堂不便認
親但問女囚何得裸體吏云此係無爲教
中人陰司例不許穿衣生叱云太褻瀆今
後改例穿衣吏方唯唯而顧視其姊已衣
矣點名畢聞堂頭鼓聲衆忽不見生自省
我何遽爲陰官卽脫冠帶置案上疾趨下
堂回看堂額乃查勘司法堂五字因誦龍
樹經信步行至一處山水明秀鳥獸花木

俱非人世所見有數老僧或坐或立一僧
呼生使向池中洗手水清見底生方探手
欲洗忽見水中現一龍頭驚悸而寤明日
請龍樹菩薩降乩書云陰官得游佛境幸
甚水中所見者卽我也何必驚怖生問吾
身後得歸佛境不乩云且完查勘司事更
圖後緣生自此忽忽不樂至來年端午日
無疾而逝遺言以龍樹經爲殉惜不傳

賜奴婢

見聞錄石首袁榮襄公宗阜爲世廟日講
官數陳明佗上喜欽賜家奴女婢各六人
初榮襄爲興府長史時中酒晝寢夢一美
姬扶床跪請曰妾備充李白洲下陳今願
侍相公帷幄哀夢覺異之召黃夫人語焉
旣而李以黨宸濠敗妻孥沒入官至是榮
襄所愛女婢李姬果與焉宛然夢中人也

梁未央大度

亦巢偶記梁朝鐘字未央粵東番禺名宿也內閣洪承疇慕其名聘致幕中甚相得一日洪有他行以夏楚付梁俾無論男女大小有不法卽以治之旣而一妾有犯梁竟責之妾之弟悍少年也以辱其姊大恨必欲殺之梁知不免告曰侯子寫一家書當就死少年持刀待之作書未竟家人報

洪歸矣少年驚而逸去及梁見洪並不及
此事後別洪歸路逢大盜卽少年也見梁
大喜曰我欲殺君竟不向主人言之真爲
可敬厚有所贈梁固有大度此少年亦非
尋常人也

易頭腹

今世說宜興周立五啓爲弱冠時顧未高
兩頤逼而禿而有稿色鄉人竊笑之曰此

黃冠相耳立五聞之若弗聞也年三十二
猶困童子試偕其父荆南旅宿南城外倉
橋側夢中見一雉冠絳衣人右手操刀左
手提一人頭髮髯如戟至榻前易其頭去
以手所提之頭函其頸立五大驚持父足
疾呼及舉手摩之頭如故凜凜者累日未
幾面顴漸高兩頤骨漸豐鬚髮兼然日益
長越年餘又夢一白鬚老老冠緇冠執長

尾塵隨一金甲人曰請吾來易爾腹語訖
金甲人抽所佩刀啓立五腹出其臟腑滌
濯而復納之旣納以方竹笠覆其腹上取
針錐釘四角立五夢中聞響聲丁丁而怪
其無痛也釘畢白鬚老者揮塵而祝曰清
虛似鏡原本無塵忽釘與笠豁然有聲立
五遂寤自是文學日進順治乙酉丁亥歷
試兩闈皆獲售官侍講學士

海中黑孩

南通州邊海鎮臺諾公適有馬二百餘放
青海口司牧者每見群馬驚躍望內地而
馳者不一次群牧疑爲盜馬者遂早晚候
之選駭騎沿海從外躡之者數矣並無入
迹逮後方得一小黑孩從海中出則群馬
爲之奔逸也牧人其讎得之以進諾公諾
公卽着眾牧參養之無使逸去始則不食

繼而知餓勉食粥飯嚴寒衣之衣亦衣漸
識人言久之亦遂能人語但其肌膚純黑
眼珠綠而齒殊黃若五官則盡與人同四
年之久防閑者亦踈因長夏無衣復逸入
海而不知所之想卽鮫人之類歟此乃齊
門司閤張瑞石所親知目見者

秦女將健兒

吮語石碁司女將軍秦良玉畜健兒名來

狩者精擅鳥銃百發不失一方秦師抵渝
隔江望見張黃蓋者循女牆坐遽命彈之
狩應手一發中執蓋者并仆其坐旣復潛
渡依城仰擊連中數人城中出鐵騎衝突
兵多覆溺秦悔失狩謂卽千金吾不與易
也亡何附船柁歸身面中數鎗然不死秦
以自食金匕箸食之仍犒以白鏐一錠

巨神呵長

韓莊張天護佑夜夢巨神呼令長長因竦
身展足抵隣籬爲鄰媼驚止嗣是長八尺
餘長髯肥軀過城市入競聚觀馬不得行
佑仰攀卓楔脚束馬上去地二三尺衆駭
服嘉靖元年山東礪賊王堂流劫歸德柘
城諸縣申陽兵使者往勦令佑控馬猝遇
賊孔裳店佑執大屋梁據高阜呵賊辟易
就擒以貧不願官受賞而歸壽終於家

刀筆

如臯有一善刀筆吏見石莊司巡檢申文
內稱巡檢司弓兵某等拏獲巨盜若干名
因語之曰弓兵獲盜于官何與文已將投
不及竄改索其五金乃于司字傍直添一
筆爲同弓兵某等獲盜申文上而巡檢得
旌矣又郡有三童子交毆而斃其一官擬
一人抵死其父欲爲申辨袁武生語之曰

爾第酬吾多金可片言豁也與之因書牘云三嬰戲毆非姦非盜非仇六手交加一死一生一抵上司見而釋之真刁筆也

狡僧

萬曆中憲副李某素不喜緇衲守湖州時一日出行有僧持十金一緘闌告道左謂得之拾遺故上獻以憑示給李高其行命住持某寺董修殿之役出疏自捐百金潮

屬得數千同事胥者鐫之篋笥鬻材鳩工
業有日矣會李坐堂有蒲伏堦下能誦其
緘書筆迹合一李亟命以遺金還之信禮
愈甚已乃僧忽他出數日不返探其篋笥
空空如也蓋十金書緘亦狡僧埋伏之術
臨行一併脫去矣

神鬼有靈

萬曆丙辰五月初二贛州城外水發高女

墻數丈沿江大厦巨礎胥付洪濤城內至
沒樓脊有業酤者憑几樓上子母忽水湧
去至萬安縣百家村尙據几無恙也城東
三十里有儲潭廟水發之先廟神見夢于
廟祝令移像至山絕頂去原位高數丈水
果及所移地而止又一泥塑鬼卒乘流東
下顏面剝落越數日溯流而上仍立於原
位衆異之重加裝飾孰謂土木偶無靈哉

屠語

萬曆中如臯冒汝九之廬州城中多屠驢
者黎明方頽櫛一衛突入牀前問之將就
死地急持金向屠祈贖屠業淋漓擣頭顱
至矣冒戲之云郗名廬何得屠驢屠荅云
未聞公維揚不宰羊也冒爲之語塞

善斷

萬曆中直指姚公世所令江都時有兄弟

以家貲構訟者其兄以百金托一貴人爲
居間公廉知其狀陽領之比庭鞠日訊其
兄曰若與貴人有何瓜葛則以父黨之中
表對公曰若弟獨非其中表耶胡獨爲汝
地卽吾憐若弟貧公斷亦未必卽百金也
若何吝于弟而他是圖趨令如數取金昇
其弟而置其兄免寃貴人慄而服之

宋司理厚德

萬曆乙卯韻郡宋司理名懷祖者蜀之富
順人遇直指按部訐訟奸民競砌單款以
害良懦宋爲旤置郡前給之曰若盍投牘
此中吾且爲彙呈也投者幾數百紙比直
指放告過日則盡付一炬矣越三年其子
階吉弱冠舉蜀榜之第六名

八條絃

琵琶四絃京師東院陳妓雙彈合調都人

謂之陳家八條絃如臯宗孝廉羅中曾揮
千金於都門買一較書亦陳姓其名爲一
軸畫又南京院妓有一串金亦的對也

土麴

江西餘干縣有一酒家常施一道人酒不
索酒錢道士曰吾有以報之引至一處指
其土曰此可代麴爲酒歲省造麴若干錢
也至今其土取之不竭

爲園

或問爲園之道於沈石田石田對曰多種樹少起屋又長興盧仲甫秉常訪蔣堂堂方爲園謂秉曰亭沼初完恨林木未就耳秉曰亭沼如爵位一時遭際或可得之若林木非培植弗成正如士大夫立名節也

號因姓重

宋文文山節義凌霜名重古今宋道士方

方壺善詩畫名著一時又萬曆間楚人方
方壺名尙贊亦善書吳郡文文水衡山太
史子擅詩畫名文文起亦衡山太史曾孫
王戊鼎元入內閣羅羅浮金陵人工書法
石石洞名淮江浦人與莊定山同榜由詞
林爲督學年二十六七卽致政歸漫游名
山不知所終以嘗讀書石洞菴故號石洞
近錢塘吳吳山亦以詞藻見稱

竊爐

畫墁錄宋與北人誓兩界非時不得葺城
堞李元則知雄州欲展城無由因作銀鑪
寘城北土神祠一旦使人竊去因大喧鬧
蹤跡去來辭連北疆紛紜久之遂興工起
築今雄州城北是也語云行陣之間不厭
詐僞弦高誕而存鄭子囊北而全楚元則
誑而固圉機心機事時有用之而濟者蓋

亦君子所不諱也

孟嘗食客

列士傳孟嘗君上客食肉中客食魚下客食菜馮驩彈鋏歌無魚蓋求爲中客也以市義事卒爲上客○青城南佛寺相傳爲孟嘗宅尚有鑊釜在其所用以待食客者封氏見聞錄獲大者容四十石小者二十石釜可受七八石

中郎有後

晉書羊祜傳祜蔡邕外孫討吳有功將進爵上乞以賜舅子蔡襲詔封襲爲關內侯則中郎未嘗無嗣而蔡克別傳亦云克祖睦蔡邕孫也克再傳爲司徒謨則中郎後裔且蕃盛於典午之代何得云無嗣哉○代醉篇羊祜父道先娶孔融女生子發後娶蔡邕女生承及祜適發與承俱病度不

能兩存乃專心養發承竟病死邕女之賢
如此而後漢蔡邕傳無聞列女傳止載文
姬沒胡中生二子贖歸重嫁董祀事而亦
不及羊道之婦史失去取甚矣

供荔枝

漢孝和時南海獻龍眼荔枝十里一置五
里一候驛馬晝夜傳送至有死於道者時
唐堯上書以爲二物升殿未必延年益壽

請罷之

見謝承漢書

又金史載世宗時亦遣送

荔枝以諫議大夫黃久約諫令罷之然則
荔枝之獻前有漢宮後有金室不獨始於
唐家所謂一騎紅塵知道荔枝來者特以
妃子之故遺訛史冊耳

鼻祖耳孫

鼻祖始祖也黃山谷詩云鼻祖以來傳父
兄許旌陽服氣書云人受胎於父母其生

始成鼻故鼻云祖今畫家寫照畫美人俱從鼻始鼻祖可對耳孫前漢書惠帝紀上造以上及內外公孫耳孫有罪當刑應劭云耳孫子孫之子也言去高曾遠但耳聞之也李斐云耳孫曾孫也晉灼曰耳孫子孫之曾孫也諸侯王表在八世顏師古曰耳音仍以爾雅有仍孫無耳孫故也然以義揆之宜讀本音爲是

鞭尸

史載吳兵入郢子胥求昭王不得乃掘平
王墓出其尸鞭之三百申包胥責其已甚
張伯起謂鞭尸者伯嚭報誅伯州犁之讐
而史傳以爲子胥者蓋以子胥不禁鞭尸
責在元帥此春秋責備賢者之義及閔穀
梁傳疏云春秋說文謂子胥鞭平王尸血
至踝按平王之卒至是已十餘年而言血

流至踝者必無之事也或者子胥至孝所
感天使血流以快孝子之心乎然血流漂
杵載在周書孟子猶云盡信書不如無書
安知血流至踝非好事者爲之哉又吳地
記云越軍入吳臨江北岸立壇殺白馬祭
子胥盃動酒盡似謂子胥快心越軍之入
者恐忠義如子胥雖死忍見吳社墟哉盃
動酒盡亦事之未可信者

西王母考

爾雅西王母乃西方荒僻之國賈誼新書
堯西見王母訓又漢貳師將軍西伐宛斬
王母寡之頭據此則西王母猶國名女真
人姓胡母其實非婦人也而以西王母爲
婦人者由汲冢周書穆王乘八駿西巡狩
宴瑤池而王母捧觴又漢武外傳以七夕
會于甘泉王母捧仙桃而下山海經西王

母梯几而戴勝杖其南有三青鳥爲王母
取食又有三足鳥主給使在崑崙之墟郭
璞註穆天子傳曰西王母如人虎齒蓬髮
戴勝善嘯是亦奇形怪狀未聞有仙桃瑤
觴美人侍女綽約流盼之態而世乃繪圖
以祝人壽者本於甘泉賦想昔玉母欣然
而上壽之句涇州回山有王母宮陶穀撰
紀欲躋之祀興流傳至今遂爲勝事也

穴中龜蛇

考堅志慶元二年三月泰州韓羽建墓正
晝間見一紅裳婦人一皂衣髯翁從山而
下異之歸述與妻徐氏徐夢所見二人跪
於床下婦曰妾與翁在山五百餘年矣今
日方遇主人無以效勤敢獻微物捧出紫
囊中有所盛徐接之而審手內有所執呼
婢點燭視之見是紫袋中包一瓠搖之有

聲置之於几。明日韓復入山，夜夢徐又夢二人跪婦曰：「昨與娘子一瓠，七竅在內，可鑽開取食。」生七七子爲國家棟樑如年，毫可與媳婦服。亦生七孫，聞來曰：「開金穴，如見妾等，不可殺害。」徐曰：「汝等在何所？」曰：「盡在穴中。」一長一尺八寸一高三寸。徐驚覺以告其夫。明日於土內得一赤蛇，長尺八身紅如金，一龜高可三寸，身綠色。韓以銀

盆貯之捧歸藏於厨翌日啓視無所見矣
○宋吳璘之制蜀也以焚金坪叢茂見烟
燄中有黑氣從東南去則逆賊生時也後
以叛族傳方正學之父亦焚穴蛇雖忠逆
不同而赤族則一不如韓羽之爲得也

肉塊

搜神記新莽時南陽市中生一肉塊研刺
不入以問費長道後漢又道曰此物一名

肅二名伏中有鐵券長二尺六寸云王家
衰劉家當興須得七歲女子尿之可開也
葬試之果然又魏志載公孫淵時襄平北
市生肉塊長圍各數尺有頭目口喙無手
足而動搖占曰有形不成無體無聲其國
滅載詎劉聰時流星落平陽北十里視之
有肉長三十步廣二十七步臭聞於外肉
傍常有哭聲生肉之異大都亡國之徵

冥報

諸書所載白起李林甫曹翰秦檜等歷劫
爲猪牛受報宜矣若隋書李士謙傳鯨爲
黃熊杜宇爲鵲鳩褒君爲龍牛哀爲獸彭
生爲豕如意爲大黃母爲黿宜武爲鰲鄧
艾爲牛徐伯爲魚鈴下爲鳥書生爲蛇云
皆佛家輪轉之道又宋虞仙姑詣蔡京見
大貓蹲踞榻上撫其背曰此章惇也廣聞

錄載隆慶中京師顯靈宮道士買一魚腹
有秦白起妻四字果報錄載萬曆中武林
一士夢冥王判秦檜爲龜云剝剔以償夙
孽鑽灼以罄餘智後江上漁翁網得大龜
腹有秦檜字說儲載宋天聖中侍中馮拯
薨錫慶院側人家生一驢腹下白毛成馮
拯字馮氏以金贖之但史稱馮拯氣貌
嚴重頗得大臣體不知何以得此譴也

呂需

見聞錄新鄭高公拱修華亭徐文貞惜之
怨其下遂有承望風旨者徐族幾碎文貞
作書達之新鄭時文貞之客呂需號水山
唐棲人老而負俠腸僞爲徐使者持書而
謂新鄭新鄭與之酒食不敢以勺粒入口
哀號泣訴達于新鄭之內夫人以至乳媪
女婢無不感動皆爲文貞潛解之而新鄭

意亦稍解文貞之得全呂需之力也新鄭
荅書詳載見聞錄中

土鼓鳴冤

見聞錄嘉靖中沈青霞之子襄相高逮之
獄必欲致之死襄居獄以土造鼓矢之天
曰此鼓若鳴則我父子之冤當白鼓成擊
之不鳴則又搏土爲之如是者歷幾年一
日鼓成果有聲適嘗敗得出獄

顏邦直

夸堅志弋陽丁頭巖農夫何一傭工於添
公鎮顏邦直家三歲工滿辭歸相去一程
聲問不通慶元二年四月何在田插稻忽
見顏當前立何識故主升龐上揖顏曰可
伴我行何卽隨去半月不反何妻齊氏使
兄詢於顏家其子孫曰我家二郎下世已
一十九年如何要何一使喚兄歸述其言

杳然不復可求四年正月何忽還妻問其
因依曰二郎帶我去游廬山徧歷諸寺去
歲四月到蘄州蘄水武三郎家武留宿二
郎謂之曰君之妾桂奴是生身活鬼其所
拾一子方七個月亦是怪魅武命桂奴至
扣審其事桂奴顧二郎曰汝道我非人爾
亦是無身之鬼脫賺何一往來五千里使
何妻兒想念二郎荅云我雖無身然賴生

前看度人經有功故得逍遙自在我欲拔
度何一超生離苦豈是害他桂奴無以對
卽抱拾得之子走向厨中途不見二郎尙
要挾我游大孤山我不肯因歸妻大驚二
月間何一在田中又見顏來呼遂死

賜無畏

唐時每恩及功臣多云賜無畏幽閒鼓吹
載裴休在相位一日奏對宣宗曰今賜卿

無畏有何貯畫言乎韓偓金鑾密記云面
處分自此賜無畏又云已曾賜無畏卿宜
凡事盡言其言淺鄙不知所起予意疑卽
孟子所引泰誓王曰無畏寧爾之意說儲
謂出自普門品經云是觀世音菩薩于怖
畏急難之中能施無畏故此娑婆世界皆
號之爲施無畏者此云賜無畏蓋借普門
品語更施爲賜見其恩出自上耳

年號仍襲

南唐賊張遇賢宋貝州賊王則睦州方臘
俱改元永樂金賊楊安兒及元出帝阿速
吉八並改元天順雲南賊段思廉宋西夏
賊李遵頊俱改元正德魏元法僧梁王琳
立永嘉王蕭莊稱帝俱改元天啓至正戊
戌紅巾賊徐貞一陳友諒隔江南下吉安
亦稱天啓又郭青螺集中載萬曆初泰和

人掘地得一銅法馬如月樣上鑿天啓三年置乃知永樂天順正德天啓皆前代僭竊年號而明代四襲之宰相不讀書匪獨朱初也○按正德改元後吏部尙書馬文升試士因出宰相須用讀書人題以譏劉文靖諱謝文正遷而隆慶之號雖不犯重至改隆慶州爲延慶衛改隆慶殿爲慶源殿時當國者徐文貞階不得辭其責也

正字紀年

朝家紀年多以正字爲諱如魏齊王芳之
正始高貴鄉公之正元梁武陵王之天正
金湯王之正元正隆金哀宗之正大元順
帝之至正並爲亡徵明英宗之正統遂至
北狩武宗之正德卒至乏嗣雖不失國終
非吉兆蓋正字以一止爲文故也

蚘蛇油

庭間述畧明武宗初年嘗宿豹房劉瑾等以蚺蛇油萎其陽是以不入內宮蚺蛇幾年萎如之後西幸悅劉妓甚寵之呼劉娘娘然在途諫帝幸浙且促回鑾與有力焉

兩太宰謚

陳太宰謚楷弓註云太宰至之子孔穎達云與吳太宰謚名號同而陳太宰博聞強識多有所言兩太宰謚何忠俊星淵哉

看殺

晉衛玠美丰姿從豫章至下都觀者如堵
玠體不堪勞遂病死人謂之看殺衛玠蘇
子瞻自海外歸抵陵時病暑著小冠披半
臂坐船上夾運河千萬人觀之子瞻顧謂
坐客曰莫看殺我無何亦竟卒荆溪將屬
續時對僧惟琳曰西方不無但个裏着力
不得便見子瞻大得手處恐衛洗馬未必

有此見解

來虞子

隋來護兒以武畧任將帥而其子匡濟兄
弟相次知政事學士虞世南文學邁世而
其子祖不能纂其業爲入仗宿衛陸元放
戲曰來護兒兒把筆虞世南男帶刀許敬
宗曰護兒兒作相世南男作匠文武豈有
種耶

泥金報喜

談苑新進士及第以泥金帖子報其家謂之喜信太平清話宋時新及第者有金花榜帖用塗金紙濶三寸長四寸許大書姓名下有兩知貢舉花押又用白紙作封帖貯金花帖於中外亦書姓名謂之泥金報喜又明初在京中式者必於原籍出榜張掛今惟紙條一幅不知此儀廢於何時也

清俸

仁和王丹麓年踰四十益復困頓妻鄒夫人戲語之曰同學少年皆不賤奈何夫子獨長貧丹麓曰吳廬少詹有言貧者上天所設以待學者之清俸金陵吳介茲晉亦言天以貧德人今處儔類之中天幸德我特頒清俸義難獨享願以共啣鄒夫人哂曰君意良厚但不知何日俸滿耳

饅頭

蠻地以人頭祭神諸葛孔明征孟獲命以
麪包肉爲人頭以祭謂之蠻頭今則訛而
爲饅頭又淮源舊有祠堂蠻俗恒用人祭
之北史韋珍爲東荊州刺史乃曉告曰天
地明靈卽人之父母豈有父母甘子肉味
自今宜悉以酒脯代用羣蠻從約而春秋
時至用國君于社如用邾子于次睢之社

其慘酷更倍于蠻俗矣

酷虐

史稱晉靈公從臺上彈人觀其避丸巢王
元吉當衢而射觀人避箭姐已置蠆盆令
宮女裸浴觀其楚毒以爲樂齊後主亦置
蝎浴斛令人裸浴觀其叫號則大喜漢主
龔掩亦聚毒蛇水中以罪人投觀其嚙啖
謂之水獄又北齊文宣每行載死囚以從

有他怒則取殺之以爲快呼爲供御囚太平廣記張思和斷獄諸囚必被枷鎖人號生羅刹後所生男女皆着肉鎖手足並有肉杻五行記六業中有卒暴酷諸囚後生一子肩上有肉枷無項芥視人命以供喜怒卒獲慘毒之報如此

儉德

史稱晏子一狐裘三十年南齊書卞彬所

皇朝通志卷之三
著帛冠十二年不改易又虞玩之所躡屐
二十年不辦易北史魏司空長孫道生一
熊皮障泥數十年不易宋冠平仲壽幃二
十年不易遼史張儉一敝袍聖宗密令近
侍以火夾穿而記之屢見不易問之儉曰
臣服此袍已三十年范忠宣之客皆布被
諸人儉德足挽靡風而公孫弘獨以布被
見譏直譏其詐耳

蔣侯茅記從

蔣子文爲鍾山神歷代廟祀不絕晉記特
堅入寇會稽王道子以威儀鼓吹求助於
鍾山神奉以相國之號及堅之敗見草木
皆兵南史魏軍圍鍾離蔣帝許梁扶助曹
景宗遂挫敵人宋元凶齊東昏禱之終莫
救於敗亡助順禍淫昭昭不爽又李全乞
靈茅司徒廟無應全怒斷神左臂或夢神

告曰全傷我全死亦當如我後范蔡敗賊
新塘收骸骨瘞之得全左臂無一指神言
驗矣可謂土木偶無靈哉惜不能爲國殺
賊而祇洩斷臂之憤終却蔣侯一籌

血逆流

搜神記于公辯東海孝婦周青冤天乃雨
解死車載十丈竹竿以懸五幡誓於
公曰青若有罪血當順下青若枉死血當

逆流行刑已其血青黃緣幡竿而上極標
復懸幡下注又晉書建興中斬督運令史
淳于伯血著柱遂逆上終極柱末三文三
尺旋復下流其子忠訴詞稱在齊書陳顯
達爲官軍所敗趙潭注稍落馬斬之離側
血湧湍離又洛陽伽藍記神龜中河間劉
宣明以直諫忤旨斬于都市血亦逆流目
終不啞屍行百步諸人並以淋漓殘敗之

血肉能自白其在刑官能不爲之動念哉

女請代刑

唐咸通六年滄州鹽院吏趙鱗犯罪至死
有女請隨父死鹽院官崔據列狀以聞詔
哀之兼減父死永樂甲申江浦知縣周益
成化丙申蒲州清東驛驛丞馮佇俱有罪
當刑益妻梅氏佇妻李氏俱具疏請代夫
刑詔特宥之是皆女子中之有至性者

想當然

孔融與曹操書稱武王伐紂以妲己賜卹
公操不悟後問出何經典對曰以今度之
想當然耳蘇長公對策有堯曰殺之三皐
陶曰宥之三旣登第主司問所出曰想當
然耳蓋本孔北海語

古人自守

楊子雲作法言蜀人齎錢十萬願載其名

子雲以爲富無仁義正如國鹿欄牛郤之
張知白守臺臺富人修佛廟成知白召僧
修爲記富人遺五百金求修附名修投金
庭下曰吾不忍以匪人汚吾文古人之自
守如此

無對字

孫沙溪先生云古今字俱有對如吉對凶
上對下與高卑深淺飢飽寒暑之類皆有

對惟渴字無對又云陷古時人無詐僞故
六經中無真字人不知有異端故六經中
無仙佛僧等字毛序始云大學無斯字論
語無此字尙書無也字未有人拈出

知足

胡文定公語楊訓曰人家最不要事事足
意得常有些不足處便好人家若事事足
意便有不好事出來亦體消長之理然也

袁中郎語汪進之曰人家一妻數妾和美無間却無好處得他們小小炒鬧我從中解紛乃有些好光景人家做官一申進士徑直做到尙書却無好處得過遷謫歷些坎坷堅其德性煉其才品乃有些好光景語若不近人情然能覺此中有好光景便有處困而亨之意隨遇而安怨尤俱釋非大有學問人不易道此

飲酒賦詩

晏元獻與客宴飲稍闌卽罷遣歌樂曰汝
曹呈藝已徧吾當呈藝乃具筆札相與賦
詩米元章邀蘇子瞻飲列紙三百置饌其
傍每酒一行伸紙作字一二幅小史磨墨
幾不能供飲罷紙亦盡乃更相移去先輩
風流卽一盃酌間不忘以詞翰相課亦異
乎以飲食游戲相徵逐者矣

二氏廢興

齊文宣敕道士剃髮爲沙門宋徽宗令沙
門冠簪爲道士此二氏之通爲興廢也周
武帝廢佛道教而其子天元復之唐高祖
廢浮圖老子法而其子太宗復之此二氏
之並時興廢也昭昭乎揭日月而常行亘
天地而不廢其惟吾夫子之教乎

千佛寺

帝京景物畧萬曆九年孝定皇太后建千
佛寺於德勝門外殿供毘盧舍那佛座繞
千蓮蓮生千佛時朝鮮國王貢尊天二十
四身阿羅漢十八身詔供寺中其像銅而
光如漆範鑄質良穆肅慈猛相具神足其
天人示現威儀亦與東土形摹迥別時西
蜀徧融和尚以誣受訛師稱華嚴佛號一
聲刑具斷裂訊者驚止衆乃延請住寺法

聲大振寺南一里另有小千佛寺

剖心觀胎

俗謂人皆愚曰一竅不通蓋有所本呂覽曰紂殺比干而視其心以驗七竅孔子曰其竅通則比干不死矣高誘註孔子言紂一竅不通若一竅通則比干不見殺又紂剖孕婦以觀男女人所共知世紀云紂剖比干妻以視其胎人所未知特拈出之

鬼眼

宋藝祖謂陶穀一雙鬼眼神宗亦謂杜常
一雙鬼眼穀傾危士也常折節學問無底
里氣河陽久旱下車而甘雨隨直州河決
及坐而橫流止此可與穀同日道哉舜目
重瞳項羽亦重瞳皮相何足以盡人

足下黑子

相法足下有龜文黑子並大貴張仁愿示

之安祿山而祿山亦以呈仁愿遂納爲義
兒西門軍容示之吳行魯而行魯亦以呈
軍容曰吾爲汝成之郭汾陽以示渾咸寧
咸寧亦以呈汾陽汾陽曰不逮吾足相
之貴一也汾陽最矣祿山羯漢軍容刑餘
何以稱焉

一身是膽

蜀志姜維膽大如斗山房隨筆張世傑屍

見焚膽亦大如斗不化南史李贍起兵討
侯景被執遇害膽大如升北史周文時王
雅芒山從蹶獨拒敵兵周文歎曰王雅舉
身悉是膽人但知趙子龍一身都是膽而
不知有王雅故爲拈出

長頭長腳長舌

後漢書賈逵不通人間事而能折節下問
諸儒爲之語曰問事不休賈長頭南史范

雲指范岫謂人曰諸君進止威儀當問范
長頭以岫多識前代往事也兩長繼美奕
世流芬南渡太學諸生素輕秦檜目爲秦
長脚及爲相范同云這長脚漢也會做兩
府而檜妻王氏時目爲長舌婦二長濟惡
鹵德秦會異蹟云秦錫夢檜且受鐵鞭
則脚雖長至跳不出鬼門關而婦雖長
舌恐不能巧飾以騙閻羅也